

22 JUN 1999

Nik Aziz-Razaleigh

PELANTIKAN KU LI BUKAN ANCAMAN UNTUK PAS PERTAHANAN KELANTAN

BACHOK, 22 Jun (Bernama) -- Menteri Besar Kelantan Datuk Nik Abdul Aziz Nik Mat berkata pelantikan Tengku Razaleigh Hamzah sebagai Pengerusi Badan Perhubungan Umno Kelantan bukan satu ancaman kepada PAS dalam mempertahankan pemerintahan kerajaan negeri Kelantan.

Beliau berkata ini memandangkan Tengku Razaleigh hanya berpengaruh pada masa dahulu tetapi sekarang sudah berubah dengan rakyat boleh menilai sendiri perkara itu.

"Sekarang ini, dia sendiri (Tengku Razaleigh) buat masalah...masalah peribadi saya tak nak sebut banyak, tapi orang Kelantan kenal siapa sama-sama Kelantan," katanya kepada pemberita di sini, petang ini.

Beliau berkata demikian ketika diminta mengulas pelantikan Tengku Razaleigh sebagai Pengerusi Badan Perhubungan Umno Kelantan, jawatan yang disandang selama 10 tahun oleh Perdana Menteri Datuk Seri Dr Mahathir Mohamad.

Nik Aziz, yang juga Mursyid Am PAS, bagaimanapun berkata parti itu tidak menentang Tengku Razaleigh dari segi peribadi tetapi apa yang ditentang ialah dasar Umno yang dianggap sekular.

"Mengenai Ku Li, kita tidak bertengkar dari segi peribadi, kita pejuang Islam tidak bergeser (bergaduh) dengan peribadi...mari siapa pun, yang kita lawan ialah dasar sekular.

"Kalau pucuk pimpinan nak berubah, berubahlah tetapi selagi dasar tidak berubah selagi itu kita lawan, tidak kira siapa," katanya.

Ditanya mengenai senarai pemilikan saham oleh kroni bekas timbalan perdana menteri Datuk Seri Anwar Ibrahim yang dipamerkan pada perhimpunan agung Umno ke-53 baru-baru ini, Nik Aziz berkata : "Itu saya tak tahu, yang keluar tu kroni Mamat ke, kroni Salleh ke, itu dia punya pasal...inilah parti yang dia target (sasar) nak bolot harta akhirnya harta makan dia balik".

Beliau juga ditanya mengenai perbandingan baik buruk antara Umno dan PAS seperti yang dinyatakan oleh perdana menteri pada perhimpunan agung Umno itu.

"Kita (PAS) beza dengan Umno satu sahaja. Dia (Umno) nak 11 (perbezaan) ke, 20 ke, 100 ke, itu dia punya pasal...beza kita ialah asas kita Islam, asas dia sekular," kata Nik Aziz.

--BERNAMA

BD NAK